

**Ledscha davart l'instituziun da dret public  
«Sanadura»**

A basa da l'art. 87 al. 2 da la constituziun chantunela dal Grischun, l'art. 9 al. 1 da la ledscha per promover la chüra d'amalos e l'art. 50 al. 2 in colliaziun cun l'art. 59 da la ledscha da vschinaunchas dal chantun Grischun constitueschan las vschinaunchas da la Regiun da provedimaint da sandet Engiadin'Ota ün'instituziun da dret public cumünaivla confuorm a las seguaintas disposiziuns

## **I. In generel**

### **Art. 1**

#### **Transferimaint d'ün'incumbenza publica**

<sup>1</sup> Las vschinaunchas da la Regiun da provedimaint da sandet Engiadin'Ota (RPSEO) (vschinaunchas purtedras) chi approuvan quista ledscha ed il deposit correspondent aint il chapitêl da dotaziun constitueschan ün'instituziun da dret public (instituziun) e l'incumbenzeschan i'l ram da sia cumpetenzza da garantir il provedimaint da sandet in Engiadin'Ota.

<sup>2</sup> La pusiziun giuridica, l'organisaziun, las incumbenzas scu eir ils drets ed obligs da l'instituziun as drizzan tenor quista ledscha.

### **Art. 2**

#### **Fuorma giuridica, nom e sedia**

<sup>1</sup> L'instituziun es independenta e dispuona d'ün'egna personalited giuridica.

<sup>2</sup> L'instituziun vain mneda suot il nom «Sanadura».

<sup>2</sup> Ella ho sia sedia a Samedan ed es inscritta aint il register da commerzi.

## **II. Scopo ed incumbenzas**

### **Art. 3**

#### **Scopo ed incumbenzas**

<sup>1</sup> La Sanadura ho il scopo da garantir il provedimaint da sandet in möd economic e confuorm als bsögns da l'Engiadin'Ota.

<sup>2</sup> Ella accumplescha las incumbenzas attribuidas ad ella da las vschinaunchas purtedras tres cunvegnas da prestaziun in tuot ils sectuors dal provedimaint da sandet, occasiunelmaing provedimaint acut, centers d'attempos e Spitex.

<sup>3</sup> Ella po collavurer cun furnituors publics u privats i'l sector dal provedimaint da sandet e po transferir, suot sia respunsabilitad, incumbenzas respectivmaing l'execuziun da cunvegnas da prestaziun sün oters subjects da dret.

#### **Art. 4**

##### **Principis d'accumplir las incumbenzas**

<sup>1</sup> La Sanadura furnescha sias prestaziuns i'l ram da la legislaziun surordinada scu eir tenor la strategia d'intrapraisa ch'ella ho fixo.

<sup>2</sup> Las structuradas da l'instituziun as drizzan tenor ils bsögns da las vschinaunchas purtedras respectivmaing tenor ils böts da prestaziun definieus illas cunvegnas da prestaziun.

<sup>3</sup> La Sanadura es da mner da maniera cha las cunvegnas da prestaziun paun gnir accumulidas da tuot temp.

#### **III. Relaziun cun las vschinaunchas purtedras**

#### **Art. 5**

##### **Vschinaunchas purtedras, survagliaunza**

<sup>1</sup> Scu vschinaunchas purtedras velan quellas vschinaunchas chi haun approvo la ledscha ed il deposit proporziunel aint il chapitêl da dotaziun u chi sun entredas pü tard illa Sanadura ed haun pajo il deposit proporziunel aint il chapitêl da dotaziun.

<sup>2</sup> La Sanadura suottasto a la survagliaunza da las vschinaunchas purtedras chi accumpleschan quist'incumbenza impustüt tres il cussagl da sandet.

#### **Art. 6**

##### **a) Totalited da las personas cun dret da vuscher da las vschinaunchas purtedras**

<sup>1</sup> Aint il sector da cumpetenzza da la totalited da las personas cun dret da vuscher da las vschinaunchas purtedras tuochan:

1. Decider davart propostas e tractandas suottamissas dal cussagl da sandet per la decisiun
2. Decider davart l'approvaziun da cunvegnas da prestaziun
3. Decider davart contribuziuns da las vschinaunchas purtedras a l'instituziun da passa CHF 500'000.00
4. Decider davart la desditta e la sortida da l'instituziun confuorm a l'art. 31
5. Decider davart il schoglimaint da l'instituziun confuorm a l'art. 32
6. Decider davart la modificaziun da la preschainta ledscha confuorm a l'art. 35

<sup>2</sup> Per quaut cha la preschainta ledscha nu dispuona otramaing, drouvan las decisiuns l'approvaziun da la pluralited da las vschinaunchas purtedras e da la pluralited dals votants.

## **Art. 7**

### **b) Procedura da votaziun**

<sup>1</sup> Las tractandas vegnan suottamissas a la votaziun al listess termin in mincha vschinauncha purtedra (votaziun a l'urna).

<sup>2</sup> Il cussagl da sandet trametta a las vschinaunchas purtedras la missiva, las cedlas da vuscher ed eventuela documentaziun supplementera almain tschinch eivnas aunz il termin da votaziun.

<sup>3</sup> Per quaut cha quista ledscha nu cuntegna üngünas reglamentaziuns, as drizza la procedura tenor las disposiziuns respectivas da la vschinauncha purtedra in dumanda. Subsidiarmaing vela la ledscha davart ils drets politics i'l chantun Grischun culs decrets executivs correspundents.

<sup>4</sup> Il dret da vuscher da las abitantas e dals abitants illas vschinaunchas purtedras as drizza tenor las disposiziuns respectivas da la vschinauncha da domicil correspudenta.

<sup>5</sup> Il cussagl da sandet determinescha il termin da votaziun ed il büro da votaziun e regla ils ulteriurs detagls organisatorics.

## **Art. 8**

### **Cussagl da sandet**

#### **a) Cumposiziun, partecipaziun, dret da vuscher**

<sup>1</sup> Il cussagl da sandet as cumpuona da rapreschantantas e rapreschantants da las vschinaunchas purtedras chi vegnan tschernieus da quellas confuorm a las disposiziuns respectivas da la vschinauncha purtedra correspudenta.

<sup>2</sup> Las vuschs d'üna vschinauncha purtedra vegnan rapreschantedas dad üna persuna aint il cussagl da sandet.

<sup>3</sup> Las vschinaunchas sun intimedas da delegher a lur commember elet illas tschantedas e da delegher ad üna persuna substituta sulettamaing in cas excepziunels motivos.

<sup>4</sup> Ils commembers sun intimos da piglier part a las tschantedas dal cussagl da sandet. Absenzas motivedas sun da comunicher ad uras al president respectivamaing al secretariat.

<sup>5</sup> Sch'ün commember es impedièu da piglier part ad üna tschanteda, comunichescha la vschinauncha respectiva la persuna substituta al president respectivamaing al secretariat, e que ad uras aunz la tschanteda.

<sup>6</sup> Mincha vschinauncha purtedra fin a 1'000 abitantas ed abitants ho il dret d'üna vusch. Per ulteriur(a)s 1'000 abitantas ed abitants u üna part da que survain la vschinauncha correspudenta ün'ulteriura vusch. Üna singula vschinauncha purtedra nu po disponer da dapü vuschs cu la totalited da las ulteriuras vschinaunchas.

<sup>7</sup> L'evaluaziun da las vuschs da vschinaunchas rapreschantedas succeda a maun dal numer d'abitantas e d'abitants (populaziun cun domicil permanent) confuorm a l'ultima statistica da populaziun ufficialea STATPOP disponibla (vuschs evaluatedas).

## **Art. 9**

### **b) Pusizium**

<sup>1</sup> Il cussagl da sandet es l'organ politic-strategic suprem da la Sanadura.

<sup>2</sup> Ils commembers dal cussagl da sandet nu sun lios vi da decisiuns e directivas da la suprastanza cumünela.

<sup>3</sup> Els pisseran per ün barat d'infurmaziun adequat e confuorm al temp cun la vschinauncha ch'els rapreschaintan.

## **Art. 10 c) Convocaziun**

<sup>1</sup> Indichand almain il lö, la data, l'ura e las tractandas chi sun da deliberer, invida il president per regla almain 20 dis ouravaunt a la tschanteda .

<sup>2</sup> Il cussagl da sandet as raduna uschè suvenz scu cha'ls affers pretendan que u scha almain trais commembers pretendan üna tschanteda.

<sup>3</sup> Pervi da l'approvaziun dal preventiv scu eir dal quint annuel e dal rapport annuel as raduna il cussagl da sandet almain duos voutas l'an.

## **Art. 11**

### **d) Cumpetenzza da decider**

<sup>1</sup> Mincha tschanteda dal cussagl da sandet convocheda confuorm a l'uorden es abla da tscherner e decider.

<sup>2</sup> Üna tscherna es successa respectivmaing votaziuns davart progets da ledscha sun approvedas, sch'ellas vegnan sustgnidas cun la magiurited da las vuschs evaluedas e la magiurited dals commembers preschaints dal cussagl da sandet (magiurited dubla). In cas da parited da vuschs es la tractanda refüsedada, in cas da tschernas decida la sort.

<sup>3</sup> Cun resalva da las disposiziuns davart la rechüsa es mincha commember dal cussagl da sandet oblio da vuscher. La presidenta u il president vuscha eir.

<sup>4</sup> L'uorden da gestiun decreto dal cussagl da sandet cuntegna ulteriuras prescripziuns da procedura.

## **Art. 12**

### **e) Incumbenzas e cumpetenzas**

<sup>1</sup> Il cussagl da sandet ho impustüt las seguaintas incumbenzas e cumpetenzas:

1. Tscherna da la presidenta u dal president dal cussagl da sandet e da la substituta u dal substitüt
2. Tscherna da la presidenta u dal president e dals ulteriurs commembers dal cussagl administrativ e da lur dis-charg
3. Tscherna dals commembers da la cumischiun da gestiun

4. Tscherna dal post da revisiun
5. Approver il preventiv, il quint annuel ed il rapport annuel scu eir il plan da finanzas
6. Decreter ün uorden da gestiun pel cussagl da sandet, decreter reglamaints da tariffas ed ün reglamaint d'organisaziun per l'instituziun sün proposta dal cussagl administrativ scu eir formular eventuels ulteriurs decrets
7. Preparer, fixer e deliberer las cunvegns da prestaziun traunter las vschinaunchas purtedras e la Sanadura per mauns da las vschinaunchas purtedras cun proposta directa a las personas cun dret da vuscher da las vschinaunchas purtedras
8. Approver la strategia da l'instituziun sün proposta dal cussagl administrativ
9. Fixer la strategia da proprietaris da las vschinaunchas purtedras, integrand il cussagl administrativ

<sup>2</sup> Il cussagl da sandet rapreschainta l'instituziun invers la regenza dal chantun Grischun ed invers las vschinaunchas purtedras da la RPSEO i'l sector dal provedimaint da sandet.

<sup>3</sup> Il cussagl da sandet po instituir üna cumischiun professiunela cun trais fin tschinch specialists, impustüt our dals champs speciels da medicina, chüra e finanzas.

<sup>4</sup> Il cussagl da sandet po numner giuntas our da sieu ravuogl chi s'occupan da singuls sectuors dal provedimaint da sandet.

<sup>5</sup> Ultra da que po il cussagl da sandet instituir gruppas da lavur per la predeliberaziun da singulas tractandas.

#### **IV. Organisaziun**

##### **Art. 13**

##### **Organs**

<sup>1</sup> La Sanadura as cumpuona dals seguaints organs:

- a) Totalited da las personas cun dret da vuscher da las vschinaunchas purtedras
- b) Cussagl da sandet
- c) Cussagl administrativ
- d) Direcziun
- e) Cumischiun da gestiun
- f) Post da revisiun

<sup>2</sup> Il cussagl da sandet po desister d'instituir üna direcziun respectivmaing direcziuns.

## **Art. 14**

### **a) Cussagl administrativ 1. Cumposiziun e constituziun**

<sup>1</sup> Il cussagl administrativ as cumpuona da tschinch fin set commembers.

<sup>2</sup> El po numner giuntas our da sieu ravuogl chi s'occupan da singuls sectuors dal provedimaint da sandet.

<sup>3</sup> Il cussagl administrativ po ultra da que instituir giuntas professiunelas per preparar, elavurer u realiser tschertas tractandas.

<sup>4</sup> Sper la presidenta u il president dal cussagl administrativ faun part dal cussagl administrativ duos fin quatter ulteriurs specialists, impustüt our dal sector da sandet e da finanzas.

<sup>5</sup> Duos rapreschantants faun part da la suprastanza d'üna vschinauncha purtedra, ma els nu paun fer part da la suprastanza da la medemma vschinauncha. Els nu paun rapreschanter lur vschinauncha al listess mumaint scu commember dal cussagl da sandet.

<sup>6</sup> Il cussagl administrativ as constituescha s'vess, cun excepziun da la presidenta u dal president.

## **Art. 15**

### **2. Pusiziun**

<sup>1</sup> Il cussagl administrativ es l'organ directiv suprem cun incumbenza strategic-operativa da la Sanadura. In quista funcziun propuona el las decisiuns strategicas al cussagl da sandet e porta la respunsabilitèd per l'intrapraisa.

<sup>2</sup> El rapreschainta la Sanadura vers l'exteriur, cun resalva da las cumpetenzas dal cussagl da sandet confuorm a l'art. 12 al. 2.

<sup>3</sup> In concordanza cun l'uorden da gestiun dal cussagl da sandet fixescha il reglamaint d'organisaziun traunter oter las cumpetenzas da suottascripziun e da rapreschantanza pü precisas per l'instituziun.

## **Art. 16**

### **3. Düreda d'uffizi**

<sup>1</sup> Ils commembers dal cussagl administrativ vergnan tschernieus per üna düreda d'uffizi da quatter ans. Cumanzamaint dal temp d'uffizi es adüna ils 1. avrigl.

<sup>2</sup> La reelecziun dals rapreschantants da las suprastanzas da las vschinaunchas purtedras as drizza tenor las prescriziuns respectivas da la vschinauncha purtedra correspondent. Cun lur sortida da la suprastanza cumünela glivra eir lur activited aint il cussagl administrativ.

<sup>3</sup> La reelecziun dals ulteriurs commembers es permissa duos voutas, que vuol dir cha la düreda maximela dal temp d'uffizi s'amunta a 12 ans.

<sup>4</sup> Commembers nouvelets aintran i'l temp d'uffizi dals commembers rimplazzos cun cumanzamaint dal temp d'uffizi ordinari ils 1. avrigl chi segua.

## **Art. 17**

### **4. Convocaziun, cumpetenza da decider**

<sup>1</sup> Mincha tschanteda dal cussagl administrativ chi'd es steda convocheda confuorm a l'orden es abla da tscherner e da decider, scha almain la mited dals commembers es preschainta.

<sup>2</sup> Üna tscherna es fatta respectivmaing votaziuns davart progets da ledscha sun approvedas, sch'ellas vegnan sustgnidas da la magiurited dals commembers preschaints.

<sup>3</sup> In cas da parited da vuschs decida la presidenta u il president, in cas da tschernas decida la sort.

<sup>4</sup> Il reglamaint d'organisaziun cumpiglia ulteriuras prescripziuns da procedura.

## **Art. 18**

### **5. Incumbenzas e cumpetenzas**

<sup>1</sup> Il cussagl administrativ ho impustüt las seguaintas incumbenzas:

1. Tscherner eventualmaing ad ün(a) mainagestiun respectivmaing a püs/püssas mainagestiun ed als ulteriurs commembers da la direcziun, traunter dad els eir la substituziun dal mainagestiun
2. Elavurer la strategia da l'instituziun per mauns dal cussagl da sandet
3. Deliberer il preventiv, il quint annuel ed il rapport annuel per mauns dal cussagl da sandet
4. Concepir la contabiled scu eir la planisaziun da finanzas per mauns dal cussagl da sandet
5. Decreter ils princips per l'introducziun d'ün sistem da controlla intern.
6. Fer las preparativas e la proposta al cussagl da sandet per decreter ün reglamaint da tariffas ed ün reglamaint d'organisaziun scu eir preparar ulteriuras tractandas cun oblig da predeliberaziun e dret da proposta per mauns dal cussagl da sandet, scu per exaimpel la stipulaziun da cunvegns da prestaziun
7. Decider davart l'externalisaziun d'incumbenzas confuorm a l'art. 3 al. 3 sün terzas personas
8. Rapportar regulermaing al cussagl da sandet in affers importants ed in möd adequat.
9. Executer las decisiuns dal cussagl da sandet
10. Approver las disposiziuns executivas decretedas da la/dal mainagestiun, respectivmaing da las/dals mainagestiun, concernent las incumbenzas e las cumpetenzas da la direcziun
11. Cumpetenzas da survagliaunza e da directivas invers la direcziun

<sup>2</sup> Ultra da que dispuona il cussagl administrativ da tuot las cumpetentas cha quista ledscha nun attribuescha explicitamaing ad ün oter organ.

## **Art. 19**

### **b) Direcziun**

#### **1. Cumposiziun, incumpatibiled**

<sup>1</sup> La direcziun, respectivmaing las direcziuns, as cumpuonan da la/dal mainagestiun (CEO) e d'ulteriurs commembers.

<sup>2</sup> Ils commembers da la direcziun respectivmaing da las direcziuns nu paun esser al listess mumaint commembers dal cussagl administrativ.

## **Art. 20**

### **2. Pusiziun**

<sup>1</sup> La direcziun, respectivmaing las direcziuns, sun l'organ operativ da la Sanadura.

## **Art. 21**

### **3. Incumbenzas e cumpetenzas**

<sup>1</sup> Las incumbenzas e las cumpetenzas da la direcziun, respectivmaing da las direcziuns, as drizzan tenor il sector d'incumbenzas definieu dal cussagl da sandet respectivmaing tenor las disposiziuns executivas decretedas dal cussagl administrativ.

## **Art. 22**

### **c) Gestiu**

#### **1. Pusiziun**

<sup>1</sup> La/il mainagestiun, respectivmaing las/ils mainagestiun, sun l'organ directiv suprem cun incumbenza operativa da l'instituziun.

<sup>2</sup> Ella/el maina u ellas/els mainan la gestiun e sun in quista funcziun respunsabels per la direcziun operativa (relaziun interna).

<sup>3</sup> In cas d'impedimaint da la mainagestiun u dal mainagestiun surpiglia la substituta u il substitut las incumbenzas respectivas.

## **Art. 23**

### **2. Incumbenzas e cumpetenzas**

<sup>1</sup> La/il mainagestiun ho, respectivmaing las/ils mainagestiun haun impustüt las seguaintas incumbenzas e cumpetenzas:

1. Fer propostas per la tscherna da commembers da la direcziun per mauns dal cussagl administrativ

2. Insembel cul cussagl administrativ: Garantir l'orientaziun strategica fixeda dal cussagl da sandet
3. Decreter disposiziuns executivas concernent las incumbenzas e las cumpetenzas da la direenziun per l'appruvaziun per mauns dal cussagl administrativ
4. Sün invid dal cussagl administrativ: piglier part a sias tschantedas cun vusch consultativa
5. Preparer e mner las tschantedas da la direenziun
6. Rapreschanter la direenziun vers l'exteriur

<sup>2</sup> Las ulteriuras incumbenzas e cumpetenzas resultan da las disposiziuns executivas approvedas dal cussagl administrativ.

## **Art. 24**

### **d) Cumischiun da gestiun**

#### **1. Cumposiziun**

<sup>1</sup> La cumischiun da gestiun as cumpuona da trais fin tschinch commembers.

<sup>2</sup> Al listess mumaint nu po pü cu ün commember our da la listessa vschinauncha fer part da la cumischiun da gestiun

## **Art. 25**

### **2. Incumbenzas e cumpetenzas**

<sup>1</sup> La cumischiun da gestiun ho d'examiner l'intera gestiun dal cussagl administrativ, la gestiun da la Sanadura e l'observanza da las cunvegnas da prestaziun.

<sup>2</sup> Ella cumpilescha minch'an ün rapport per mauns dal cussagl administrativ respectivmaing dal cussagl da sandet.

## **Art. 26**

### **e) Post da revisiun**

<sup>1</sup> Il post da revisiun examinescha minch'an la contabiled e cumpilescha ün rapport per mauns dal cussagl administrativ respectivmaing dal cussagl da sandet.

<sup>2</sup> Las incumbenzas as drizzan tenor las disposiziuns dal dret d'obligaziuns.

## **V. Finanzas**

### **Art. 27**

#### **Finanziaziun**

<sup>1</sup> La Sanadura as finanziescha tenor las indemnisaziuns fixedas illas singulas convegnas da prestaziun, las contribuziuns decisas e las disposiziuns cuntgnidas illa legislaziun surordinada, impustüt illa ledscha davart promover la chüra d'amalos e l'assistenza da personas attempedas e cun bsögn da chüra (Ledscha per promover la chüra d'amalos).

<sup>2</sup> Las prestaziuns vegnan dimena finanziedas essenzielmaing tres contribuziuns da la sgüraunza obligatorica per la chüra d'amalos, la partecipaziun vi dals cuosts da las personas chi retiran prestaziuns scu eir tres contribuziuns chantunelas e cumünelas vi da las prestaziuns confuorm a la ledscha per promover la chüra d'amalos.

<sup>3</sup> Il scumpart da las contribuziuns chi sun da pajer da las vschinaunchas purtedras as drizza tenor la clef da repartiziun actuela da la Regiun Malögia sainza la vschinaunha da Bergiaglia.

### **Art. 28**

#### **Preventiv, quint annuel e rapport annuel**

<sup>1</sup> La Sanadura maina ün quint individuel. Las finanzas haun da corrspuonder a la situaziun efectiva da faculted, finanzas e richevs.

<sup>2</sup> Il preventiv, il quint annuel ed il rapport annuel sun da consegnar a las vschinaunchas purtedras ed als commembers dal cussagl da sandet almain 10 dis aunz la tschantada dal cussagl da sandet.

### **Art. 29**

#### **Chapitêl da dotaziun, egen chapitêl e contribuziun vi da la gestiun**

<sup>1</sup> Las vschinaunchas chi approvau la ledscha, respectivmaing chi aintran pü tard in l'instituziun, pejan a l'instituziun al mumaint da sia fundaziun, respectivmaing al mumaint da lur entreda posteriura, ün chapitêl da dotaziun in l'otezza da CHF 2.5 milliuns.

<sup>2</sup> Per l'an da gestiun scurznieu 2026 pejan las vschinaunchas chi approvau, respectivmaing las vschinaunchas chi aintran düraunt il 2026 posterieurmaing in l'instituziun, üna contribuziun da gestiun da CHF 500'000.

<sup>3</sup> Il scumpart sün las vschinaunchas purtedras as drizza tenor üna clef da repartiziun actuela da la Regiun Malögia sainza la vschinaunha da Bergiaglia.

<sup>4</sup> L'egen chapitêl da l'instituziun es da preschanter aint il bilauntsch.

## **VI. Respunsabilitèd**

### **Art. 30**

#### **Respunsabilitèd**

<sup>1</sup> Pels impegns es respunsabla in prùma lingia la facultèd da l'instituziun.

<sup>2</sup> Subsidiarimaing sun las vschinaunchas purtedras respunsablas solidaricamaing pels impegns da l'instituziun. La respunsabilitèd interna as drizza tenor la clef da repartiziun valabla da la Regiun Malögia sainza la vschinauncha da Bergiaglia.

## **VII. Desditta e schoglimaint**

### **Art. 31**

#### **Desditta**

<sup>1</sup> Mincha vschinauncha purtedra po sortir da l'instituziun per la fin da l'an, resguardand ün termin da desditta da trais ans, la prùma vouta per la fin da l'an 2036.

<sup>2</sup> Üna vschinauncha chi sorta nun ho üngün dret da restituziun da sia part vi dal chapitèl da dotaziun u d'indemisaziuns da qualche gener.

<sup>3</sup> Scha la vschinauncha chi sorta ho già surpiglio obligs invers la Sanadura, nu vegnan quels pertuchos da la desditta.

### **Art. 32**

#### **Schoglimaint**

<sup>1</sup> Per schoglier l'instituziun drouva que l'appruvaziun da la magiurited dals votants e da duos terzs da las vschinaunchas purtedras.

<sup>2</sup> In cas dal schoglimaint da l'instituziun vain liquidada sia facultèd tres ün procuratur chi vain determino dal cussagl da sandet, per quaunt cha l'ac-cumplimaint dal scopo da l'instituziun nu vain surpiglio d'ün oter subject da dret adatto.

<sup>3</sup> Ün guadagn u üna perdita chi resta zieva l'amortisaziun dals impegns vain scumpartieu sün las vschinaunchas purtedras tenor la clef da repartiziun actuela da la Regiun Malögia sainza la vschinauncha da Bergiaglia.

## **VIII. Disposiziuns transitoricas e finelas**

### **Art. 33 Constituziun da la Sanadura**

<sup>1</sup> La Sanadura scu instituziun da dret public vain s-chaffida cun l'entreda in vigur da quista ledscha.

---

**Art. 34 Participaziun posteriura**

---

<sup>1</sup> Zieva cha la ledscha es entreda in vigur po üna vschinauncha refüsanta entrer posteriurmaing da tuot temp illa Sanadura, premiss ch'ella approuva la preschainta ledscha. In quel mumaint ho ella d'as participar al chapitêl da dotaziun e, sch'ella aintra l'an 2026, proporziunelmaing a la contribuziun vi da la gestiun confuorm a la clef da repartiziun actuela da la Regiun Malögia sainza la vschinauncha da Bergiaglia.

---

**Art. 35 Modificaziun**

---

<sup>1</sup> Modificaziuns da la preschainta ledscha pretendan l'approvaziun da la magiurited dals votants e l'approvaziun da la magiurited da las vschinaunchas purtedras.

---

**Art. 36 Vigur**

---

<sup>1</sup> Quista ledscha aintra in vigur cun l'approvaziun d'almain set vschinaunchas chi haun approvo al listess mumaint il deposit proporziunel aint il chapitêl da dotaziun confuorm a l'art. 29 al. 1 e la contribuziun proporziunela vi da la gestiun confuorm a l'art. 29 al. 2 ed illas quelas residiescha a medem temp la magiurited da la populaziun cun domicil stabel da las vschinaunchas da la RPSEO confuorm a l'ultima statistica da populaziun ufficiela STATPOP disponibla.

<sup>2</sup> La ledscha vela unicamaing per quellas vschinaunchas chi haun approvo quista ledscha ed il deposit proporziunel aint il chapitêl da dotaziun.

---